

Rudy Lampe a demanda Booshi Wever pa mas cu 53 mil florin

ORANJESTAD – Manera Bon Dia Aruba a publica, ayera mainta e caso penal cu Ministerio Publico a cuminsa contra Parlamentario señor Candelario Booshi Wever, a tuma lugar. Den sala di Corte tabata presente Parlamentario señor Wever acompaña pa

su abogado mr. A.Ruiz y tambe señor Rudy Lampe kende tabata acompaña cu su abogado mr. Flanegin. Tratamento di e caso a dura practicamente 2 ora caminda puntonan interesante a bin padilanti. Mirando e interes cu ta reina den e caso aki, Bon Dia

Aruba ta publica e tratamento di e caso den diferente parti pa asina nos lectornan tin un mihor bista di e caso den su totalidad y finalmente saca su mesun conclusion.

EXPRESIONNAN OFENSIVO A AFECTA LAMPE

Ta asina cu señor Lampe a haci uso di su derecho pa demanda daño cu el a sufri pa cu e expresionnan ofensivo di señor Wever cu a tacha su bon number y integridad. Den casonan penal, e victima por presenta den Corte y ta haya e oportunidad pa haci demanda.

Abogado mr. Flanegin a bisa Hues cu pa 25 año señor Lampe a sirbi como pastor di clero catolico. For di e acusacionnan di señor Wever di 2007, te ainda Lampe ta confronta problema cune.

E abogado a remarca cu desde December 2007 cu no a sosode nada di parti di Ministerio Publico, e expresionnan di Wever a keda tacha number di señor Lampe. Den Parlamento señor Wever tambe a haci expresionnan y esey a conduci cu señor Lampe a cuminsa un caso civil. Pesey el a apela contra Ministerio Publico y Hof a dicidi cu mester persigui señor Wever pa ta tilda señor Lampe di ta pedofile.

E abogado a bisa Hues cu como pastor, e expresionnan di señor Wever ta tacha e bon number di señor Lampe y ta un ofensa. Den un comunidad chikito manera Aruba e ta causa hopi daño.

Ta un hecho cu señor Wever a yama señor Lampe pa pedofile y como pastor esaki ta un ofensa hopi serio. Señor Lampe a entrega denuncia

riba proyecto di Dump pa cu posibel corrupcion contra señor Wever, pero te dia di awe nada a sali na cla. Despues di esaki a cuminsa cu e sushamento di number di señor Lampe. E expresionnan di Wever, na opinion di mr. Flanegin, ta inhusto y inaceptabel. Segun abogado, e expresionnan a sigui tuma lugar na 2009 y hasta 2010. El a menciona cu na Februari y Maart 2010 cu a sali publica den Diario caminda ta menciona cu un ex pastor no por bira pastor mas y no ta aceptabel cu e lo bay duna les na hobennan. Segun e abogado, actualmente señor Lampe ta sin trabou. El a pidi Monseigneur na 2009 pa e bay traha na Bonaire caminda tin vacatura, el a wordo rechaza.

Despues Monseigneur a papia cu señor Lampe caminda el a bis'e cu door di e persecucion contra dje, Wever a saca obispado for di regentenraad di hospital.

Señor Lampe, segun e abogado, tabata traha 5 año na IPA y te ainda e no a haya reaccion riba su aplicacion. Na Universidad tambe a aplica y tabatin palabacionnan pa e cuminsa traha y a lo largo e no a cuminsa. Te ainda no tin claridad si e lo haya trabao.

DEMANDA DI MAS CU 53 MIL FLORIN

Abogado mr. Flanegin a bisa Hues cu señor Lampe actualmente ta hayando su placa di pensioen. El a muestra cu señor Lampe mester a sigui procedura contra e



expresionnan di señor Wever cu a costa hopi placa. Mr. Flanegin ta haya cu señor Wever a tacha señor Lampe su number y ningun placa lo por drecha esaki. Te ainda señor Lampe ta sufri daño. El a usa sentencionan recien pa cu casonan pedofile di Corte di Husticia di Hulanda. Ta asina cu na December 1998 Corte di Hulanda a condena un persona pa a acusa un maestro di school pa pedofile na 14 mil Euro.

El a menciona un otro caso cu na opinion di mr. Flanegin ta similar cu esun di señor Lampe. Aki trata di un Parlamentario cu a haci expresionnan y na 2007 a wordo condena na 25 mil Euro.

E abogado a demanda 50 mil florin di daño cu ta e suma maximo stipula den ley. E ta haya cu esaki mester sirbi como un señal pa otro politiconan cu no por haci expresionnan sin mas. E ta spera cu un dia den reunionnan publico den Parlamento, politiconan lo sa di comporta nan mes.

Ademas e abogado a demanda pa señor Wever cubri e gastonan di e caso cu ta calcula na 3500 florin. En total ta papia aki di 53.500 florin. Hues a bisa cu e lo bay studia e caso y dia 16 di December 2010 e lo dicta sentencia.